

Headlines

- 1 चुनावों आयोग नै अज्ज उधमपुर डोडा लोकसभा हल्के लेई अधिसूचना जारी कीती। मेदवार 20 कोला 27 मार्च तोड़ी नामांकन दाखल करी सकदे न।
- 2 जम्मू-कश्मीर च 85 बरें कोला उप्परली बरेस दे बुजुर्ग ते शारीरिक चुनौतिएं दा मकाबला करा'रदे मतदाता अपने घरें थमां मतदान करी सकडन।
- 3 प्रधानमंत्री नरेंद्र मोदी होरें आखेआ ऐ जे स्टार्ट अप्स लेई कम्म करने लेई भारत दुनिया दी त्री सब्बनें शा साजगार थार ऐ।
- 4 विदेश मंत्री डॉक्टर एस. जयशंकर होरें आखेआ ऐ जे औंदे लोकसभा चुनावों दुनिया दी सब्बनें शा बड्डी चुनावी प्रक्रिया होग।

<><><><><><>

J&K Elections

जम्मू-कश्मीर केंद्र शासित प्रदेश भूगोलिक लिहाज कन्ने दऊं हिस्सें च बंडोए दा ऐ- इक कश्मीर घाटी ते दुआ जम्मू प्रांत। केंद्र शासित प्रदेश दा कुल इलाका 2 लख 22 ज्हार 236 वर्ग किलोमीटर ऐ जेहड़ा जे मुलखे दे कुल रकबे दा 6 इशारिया 7-4 प्रतिशत ऐ। एल्लै इत्थूं दी अंदाजन अबादी कोई 1 करोड़ 56 लख दे कोलकाल ऐ जिस्सलै जे वोट पाने दे हकदार मतदाताएं दी गिनतरी 86 लख 92 ज्हार 646 ऐ। इंदे चा 44 लख 35 ज्हार 541 मर्द ते 42 लख 56 ज्हार 946 महिला वोटर न। जम्मू-कश्मीर च कुल 5 लोकसभा हल्के न जिंदे चा 2 जम्मू प्रांतै च ते 3 कश्मीर घाटी च पौंदे न। जम्मू प्रांतै दिएं लोकसभा सीटें च जम्मू रियासी लोकसभा हल्का ते कठुआ उधमपुर डोडा लोकसभा हल्का शामिल न जिंदे च जम्मू प्रांतै दे 8 जिले औंदे न। चुनावों आयोग नै अज्ज पैहले गेड़ दे मतदान लेई अधिसूचना जारी करी दिती ऐ। इस गेड़ तैहत इत्थे उधमपुर-डोडा संसदी हल्के लेई चुनावों 19 अप्रैल गी वोट पोआए जाडन। इस गेड़ लेई नामांकन दाखल करने दी खीरी तरीक 27 मार्च ऐ, गी नामजदि दे कागज पत्रें दी जांच कीती जाग। नाम वापस लैने दी खीरी तरीक 30 मार्च रक्खी गई ऐ। दुए गेड़ च 26 अप्रैल गी जम्मू रियासी लोकसभा सीट लेई चुना होग। त्रीए गेड़ तैहत 7 मई गी अनन्तनाग-पुंछ-राजौरी हल्के च ते चौथे गेड़ च 13 मई गी श्रीनगर हल्के ते 5में गेड़ च बारामूला लोकसभा हल्के च वोट पोआए जाडन।

<><><><><><>

Kathua-Returning

4 उधमपुर लोकसभा हल्के दे रिटर्निंग अफसर डाक्टर राकेश मिन्हास जेहडे कठुआ जिले दे डीसी बी हैन, अज्ज 4 उधमपुर संसदी हल्के लेई नामांकन दाखल करने लेई अधिसूचना जारी कीती। अधिसूचना बारै प्रेस गी जानकारी दिंदे होई उनें दस्सेआ जे चुनावों लडने दे इच्छुक मेदवार 20 कोला 27 मार्च तोड़ी नामजदगियां दाखल कराई सकदे न। उनें दस्सेआ जे भारती चुनावों आयोग नै लोकें ते गड्डिएं दी गिनत्री बी सीमित कीती ऐ ते सुरक्षा दे निग्गर बंदोबस्त कीते जा'रदे न तां जे चुनावों पूरी रमानदारी ते सुरक्षित ढंगै सिर तोड़ चाढे जाई सकन। आकाशवाणी कन्नै गल्ल करदे होई उनें आखेआ।

<><><><><><>

Voting Facilities

औंदे लोकसभा चुनावें दरान जम्मू-कश्मीर च डेढ लख शा मते दिव्यांग ते 85एं बरें शा मती उम्मी दे बुजुर्ग मतदाता घरै थमां गै वोट पाने दी सुविधा दा लाहू ठोआई सकडन। आकाशवाणी दे जम्मू संवाददाता मुजब प्रदेश च 40 फीसद शा मती दिव्यांगता आहले 77 ज्हार 613 दिव्यांग ते 85एं बरें शा मते दी उम्मी दे 77 ज्हार 45 बुजुर्ग मतदाता न। औंदे लोकसभा

चुनाएं दौरान जेगर इनें मतदाताएं दी सेहत ठीक नेई हंडी यां इनेंगी जेगर कोई होर मजबूरी हंडी ऐ तां ओहू घरै थमां गै वोट पाने दे अपने इक्क दा इस्तेमाल करी सकदे ना। चुनां आयोग नै पैहली बारी इनें द'ऊं किस्मै दे मतदाताएं लेई एहू सुविधा उपलब्ध करोआई ऐ।

<><><><><><>

PM Modi Startups

प्रधानमंत्री नरेंद्र मोदी होरें आखेआ ऐ जे भारत 1 लक्ख 25 जहार शा मते स्टार्ट अप्स ते 110 यूनीकार्ने दे कन्नै दुनिया दे त्रीये सब्बनें शा बड्डे स्टार्ट अप तंत्र दे तौर पर उभरेआ ऐ। अज्ज नमीं दिल्ली दे भारत मंडपम च स्टार्ट अप महाकुम्भ गी संबोधित करदे होई मोदी होरें आखेआ जे देसै दी युवा शक्ति दे नमिं काडुं आहले जज्वे दे दम उप्पर भारत दा स्टार्ट अप तंत्र तेज रफ्तार कन्नै बधै मठोआ करदा ऐ। प्रधानमंत्री होरें आखेआ जे अज्ज जिसलै मुख्य 2047 तगर इक विकसित राष्ट्र बनने दी रूप-रेखा पर कम्म करै करदा ऐ तां नेय च स्टार्ट अप महाकुम्भ दा महत्व होर बी बधी जंदा ऐ। उनें आखेआ जे पिच्छले इक दहाके दरान भारत नै सूचना टेक्नोलॉजी ते साफ्टवेयर दे खेत्तर च केई बड्डी गैंही पुट्टियां न ते हून लोक भारत च नमिं काहडें ते स्टार्ट अप संस्कृति दे बधदे रूझान दिक्खै करने आं। प्रधानमंत्री होरें उद्यमिं गी आखेआ जे ओहू तेजी कन्नै अपने पेटेंट फाइल करने दे प्रति सौहगे रौहना। उनें आखेआ जे स्टार्ट अप्स नै जेम पोर्टल पर 20 जहार करोड रुपें शा मते दी कमाई कीती ऐ जेड़ी इक बड्डी उपलब्धि ऐ। प्रधानमंत्री होरें आखेआ जे बक्ख-बक्ख खेत्तरें जिआं राई-बाई, कपडा, दवाइए, ट्रांसपोर्ट, अंतरिक्ष, योग ते आयुर्वेद च लौहके शैहर स्टार्ट अप क्रांति दी अगुवाई करै करदे ना।

<><><><><><>

SVEEP-Reasi

औंदे चुनाएं लेई लोकें गी जागरूकता बनाने लेई प्रेरित करने लेई स्वीप तैहत केई गतिविधिं दा सरिस्ता कीता जा'रदा ऐ। एहदे इक हिस्से दे तौरा पर सरकारी मलाजमें गी सगंध चुक्की जे ओहू वोट पाने दे अपने अधिकार दा इस्तेमाल जरूर करडन। इस कार्यक्रम दा मकसद औंदे लोकसभा चुनां च 100 प्रतिशत मतदान यकीनी बनाने लेई पूरी कोश्ट करना ऐ। इस बारे आकाशवाणी दे जिला संवादाता देवेन्द्र ठाकुर कन्नै गल्ल करदे होई जिला चुनां अफसर रियासी विशेष महाजन होरें आखेआ।

<><><><><><>

External-Affair

विदेश मंत्री डाक्टर एस. जयशंकर होरें 18मीं लोकसभा दे चुनां गी दुनिया दी सब्बनें शा बड्डी चुनावी प्रक्रिया करार दिता ऐ। कोरिया दी राजधानी सियोल च आयोजित लोकतंत्र लेई त्रीये शिखर सम्मेलन दरान वर्चुअल ढंगै नै दित्ते गेदे इक बयान च श्री जयशंकर होरें आखेआ ऐ जे भारत च अज्ज 14 लक्ख निर्वाचित महिलां न जेहडियां दुनिया दे कुसै बी हिस्से च जमीनी सतह पर सब्बनें शा मती निर्वाचित महिलां जन प्रतिनिधि ना। उनें आखेआ जे संसद ते राज्यें दिं विधानसभाएं च महिलाएं लेई 33 फीसदी आरक्षण देने दे सरकार दे हाल दे फैसले कन्नै इस बुनियादी सिद्धांत दे महतव दा पता लगदा ऐ जे राष्ट्र दे भविक्ख दे निर्माण च महिलाएं दी अवाज गी अनसुना नेई कीता जाई सकदा। जयशंकर होरें आखेआ जे 18एं बरें दी उम्र शुरू हुंदे गै युवाएं गी वोट पाने दा अधिकार देइयै भारत एहू जकीनी बनांदा ऐ जे युवाएं दी अवाज अनसुनी नेई कीती जाई सकदी।

<><><><><><>

Ramban-Handicrafts

दस्तकारी विभाग रामबन आस्सेआ समाज दे कमजोर तबकें च महिलाएं लेई रोजगार सृजन च महत्वपूर्ण भूमिका निभाई जा'रदी ऐ। रामबन जिले च बनिहाल, गूल, बटोट ते परनोट च 7 दस्तकारी सिखलाई केंद्र ना। 18एं शा 55एं बरें दी उम्री दिं महिलाएं गी इनें केंद्रें च सिखलाई हासल होई सकदी ऐ। लाभार्थिं लेई राज्य प्रायोजित क्रेडिट कार्ड योजना बी ऐ जेदे तैहत

ओह 7 फीसदी ब्याज सब्सिडी कन्नै 2 लक्ख रुपें दा दोआर हासल करी सकदे ना। इस बरे 45 कारीगरें गी उंदे दस्तकारी युनिटें लेई दोआर हासल होआ ऐ। इस बरे तकरीबन 265 कारीगरें अपने नांऽ दस्तकारी मैहकमे कश दर्ज करोआए ना। कारीगरें गी एलीमेंटरी कोर्स लेई 1 ज्हार रुपें दा स्टार्टफन ते एडवांस कोर्स लेई डेढ ज्हार रुपें दा स्टार्टफन थ्होगा। इस बारै स्थाड़े संवाददाता कन्नै गल्ल करदे होई रामबन दे दस्तकारी सिखलाई अफसर तैयब मुजतबा रशीद होरें आखेआ।

<><><><><><>

KVS-Samba

कृषि विज्ञान केंद्र सांबा च शेर-ए-कश्मीर एग्रकल्चर युनिवर्सिटी जम्मू दे वाईस चांसलर प्रो. बी.एन. त्रिपाठी हुंदी सरपरस्ती ते मार्गदर्शन हेठ लोआया गेदा एग्री इनपुट डीलरें दा 15एं दिनें दा स्टीफिकेट कोर्स अज्ज सम्पन्न होई गेआ। जिले दे बक्ख-बक्ख ब्लॉकें थमां 15 प्रतिभागिएं एह कोर्स कीता ऐ। इस कोर्स गी करने दे बाद नौजवानें गी केई मौके उपलब्ध होडना। स्कास्ट दे अलावा कृषि विज्ञान केंद्र सांबा, मैहकमा राई-बाई, मैहकमा बागवानी दे माहिर बी मजूद हे। कृषि विज्ञान केंद्र सांबा प्रो. संजय खजूरिया होरें आकाशवाणी कन्नै गल्ल करदे होई आखेआ।

<><><><><><>

Drugs-Rally

किशतवाड दे भूपनगर च सी.आर.पी.एफ दी 52 बटालियन पी.डी.सी दे परिसर च नशामुक्त भारत बारै इक बाइक स्कूटी रैली दा सरिस्ता कीता गेआ। एहदा मकसद लोकें च नशाखोरी दे माडे असर बारै जारूकता पैदा करना हा तां जे समाज गी पूरी चाल्ली नशा मुक्त बनाया जाई सकै। इस रैली च कोई 80 लोकें शिरकत कीती। 80 लोकें रैली च हिस्सा लैता। किशतवाड दे जिला विकास कमिशनर डा. देवांश यादव इस मौके मुख्क परोहने हे जिनें रैली गी झंडी दस्सिए रवाना कीता। रैली दे समापन समारोह दौरान बटालियन दे कमांडेंट परमा शिवन होरें प्रतिभागिएं गी प्रमाण पत्र भेंट कीते।

<><><><><><>

Navroz

प्रधानमंत्री नरेंद्र मोदी होरें अज्ज नवरोज दे मौके पर देशवासिएं गी बधाई दिती ऐ। सोशल मीडिया मंच एक्स पर मोदी होरें मेद जताई जे औने आह्ला बरा कामयाबी ते विकास कन्नै भरोचे दा होग ते समाज च एकता दे बंधन गी होर मजबूत करोग। मोदी होरें सब्बनें लेई खुशी ते कल्याण गी कामना कीती।

<><><><><><>